



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.280/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtaret; Hajriz Hoti kryesues, Violeta Husaj-Rugova dhe Bujar Muzaqi anëtarë, duke vendosur përkitazi me ankesën e subjektit politik, Lëvizja Vetëvendosje (LVV), me seli në Prishtinë, të paraqitur kundër subjektit politik, Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore për Kuvendin e Republikës së Kosovës, që do të mbahen më datë 09 Shkurt 2025, në seancën e panelit të mbajtur më datë;03.02.2025, merr këtë,

V E N D I M

- I. Pranohen të bazuara ankesat e subjektit politik Lëvizja Vetëvendosje (LVV), me seli në Prishtinë, Anr.280/2025 e datës;31.01.2025, dhe Anr.284/2025, të datës;01.02.2025.
- II. Subjektit politik, Partia Demokratike e Kosovës (PDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjorbë në lartësi prej 15.000 (pesëmbëdhjetëmijë) euro
- III. Detyrohet Subjekti politik, Partia Demokratike e Kosovës (PDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë;31.01.2025 PZAP-i ka pranuar një ankesë nga subjekti politik, Lëvizja Vetëvendosje (LVV), me të cilën pretendon se më datë;30.01.2025 në një postim në rrjetin social në facebook të Smajl Lushtakut-mbështetës i PDK-së, është publikuar një tekst i cili përmban gjuhë të urrejtjes dhe ofendeuese i cili bie në kundërshtim me dispozitat ligjore të LZP-së. Parashtruesi i ankesës thekson se tekstin në facebook është si në vijim: *“Të ngrehet simboli çetnik me tre gishta në zemër të Drenicës, ose duhet të jeshë i çmendur ose çetni!, Pas 25 viteve në liri vijnë lahperat nga Prishtina të kulmisur në LVV me seli në Prishtinë-Beograd dhe Athinë, në zemër të Drenicës –Skenderaj ngrehin (tre gishtërinj) në emër (të jatit-birit dhe shpirtit të shenjte)! Deri kur do ti tolerojmë këta idiot që fshehën pas petkut partiak dhe politik, Drenica gjithnjë e ka pase tradite për mikun (bukë e krip me zemer) për armikun plumb ballit sepse farën e birzumë në Shumadi vetëm plumbi e skuqe”*. I njëjti në postimin e tij thekson se *“ta provokosh Drenicen gjakun e derdhur rr’ke nga viti 1389, kjo është antinjerzore dhe bizare! Kush! Bijte e kurvave nga Prishtina! Me demagogun dhe gënjeshtarin me të madh të shek. XXI (Kurcin)”*. I njëjti në postimin e tij thekson: *“se herën tjetër a po i presim me lule dhe tepih të kuq apo me batore dhe hanxhar”*. Për më tepër i njëjti thekson se *“ata vijnë nga Prishtina me porosi të Beogradit dhe ngrehin tre gishta nuk ka me as toleranc as hyrje në Drenice dhe kërkon nga strukturat e komunale të Skenderajt që subjekti politik LVV-ne ta shpallin non grata dhe ate zyre me tr apo katër shulikuranta ta mbyllin, dhe kushe të doje nga Drenica le të veje në Prishtinë apo Beograd të zhvilloj aktivitetet”*.

Po ashtu më datë;01.02.2025, PZAP-i ka pranuar një ankesë nga subjekti politik, Lëvizja Vetëvendosje (LVV), me të cilën pretendon se më datë;01.02.2025 në një postim në rrjetin social në facebook të Rasim Brahim Rexhepi-mbështetës i PDK-së, është publikuar një tekst i cili përmban gjuhë të urrejtjes dhe ofenduese i cili bie në kundërshtim me dispozitat ligjore të LZP-së. Parashtruesi i ankesës thekson se tekstin në facebook është si në vijim: *“Mirmëngjesi populli i Albin mashtruesit që nuk ja ka pranuar e njoft gruaja shtetin e Kosovës tash nuk e ka as të drejtën e votës a ju e keni ngul në krye të Qeverisë një kryeministër që nuk ja njeht gruaja e familjes shtetin çka i duhet kti vendi, vlerësone vet, dikush e ka jep krejt mundin jetën edhe familjen për këtë shtet e kryeministrit nuk ja njeht gruaja shtetin”*. Parashtruesi i ankesës thekson se Besim Brahim Rexhepi është konfirmuar si mbështetës i PDK-se dhe është ndëshkuar me vendimin e PZAP-it A.nr.240/2025, për një shkelje tjetër.

Parashtruesi i ankesës thekson se me këto veprime është shkelur neni me nenit 34 paragrafi 1 nën paragrafi 1.11, e LZP-së, me të cilën përcaktohet se *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: çrregullimi i tubimeve të subjekteve tjera politike ose nxitja e të tjerëve për një veprim të tillë, kërcënimi ose tentimi për të kërcënuar subjektet tjera politike, përkrahësit ose kandidatet e tyre, përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”*.

Si provë që dëshmon shkeljen e pretenduar ka bashkangjitur postimet në rrjetet sociale facebook dhe linçet për shkeljen e tyre:

<https://www.facebook.com/dona.lushtaku.33/posts/t%C3%AB-ngrehet-simboli-%C3%A7etnik-me-tre-gishta-n%C3%AB-zem%C3%ABr-t%C3%AB-drenic%C3%ABs-ose-duhet-t%C3%AB-jesh%C3%AB-/1131832268322011/>

https://www.facebook.com/story.php?story_fbid=28774952262119056&id=100000929965027&rdid=folUKIUdGalaP9DJ#

Në përgjigje në ankesë të paraqitur nga subjekti politik PDK më datë;02.02.2025, ka theksuar se pala ankuese nuk ka arritur që ta argumentojë përgjegjësinë subjektive ndaj subjektit politik PDK, dhe se ankuesi me asnjë provë nuk ka arritur që të bëjë ndërlidhjen e veprimeve të pjesëmarrësve të përfshirë në këtë ngjarje me përgjegjësinë e subjektit politik PDK, mirëpo të njëjtit janë mjaftuar vetëm me pretendimin se të njëjtit janë simpatizant dhe aktivist të PDK-së. Për më tepër PDK ka rënë në kontakt me personin Rasim Brahim Rexhepi, i cili e ka mohuar që këto veprime të kenë kryer për të fuqizuar dhe në emër të PDK-së, mirëpo këto statuse i publikon në shenjë revolte ndaj subjektit politik LVV, dhe se këto nuk nderlidhen fare me përfitimin e votave. Po ashtu subjekti politik PDK ka kontaktuar me Smajl Lushtakun për të shprehur shqetësimet në lidhje me shkrimet e tij në rrjetet sociale facebook ku i njëjti është përgjigjur se këto shkrime i ka bërë si qytetar i Drenices, dhe nuk janë bërë udhëzime apo direktiva nga PDK-ja, dhe se të njëjtin postim e ka fshirë dhe ka marrë masa permisuese për fshirjen e postimit në fjalë, dhe e njëjta propozon që ankesat të refuzohen të pa bazuara.

Paneli, në kuptim të nenit 9 paragrafi 5, nën paragrafi 5.5 të Rregullores Nr.01/2024, për Procedurat e Parashtrimi dhe Vendosjes së Ankesave të PZAP-it, dhe nenit 84 paragrafi 1 të Ligjit Nr.05/L-031, për Procedurën e Përgjithshme Administrative, me qëllim të ekonomizimit të procedurës, ka bashkuar ankesat Anr.280/2025, e datës;31.01.2025, dhe Anr.284/2025, të datës;01.02.2025, dhe janë trajtuar me një vendim, andaj procedimi i këtyre ankesave evidentohen nën shenjë të përbashkët A.nr.280/2025, për shkak të natyrës së njëjtë të çështjeve

të parashtruara nga subjekti politik LVV, kundër subjektit të njëjtë politik PDK, si për nga përmbajtja ashtu edhe për nga kërkesat e paraqitura nga ankesat.

Paneli, pasi që shqyrtoj të gjitha shkresat e lëndës në kuptim të nenit 117 paragrafi 3 të LZP-së, vëren se ankesat janë të bazuara.

Paneli, pas shikimit të shkresave të lëndës të ofruar si provë materiale, nga e cila rrjedh se Smajl Lushtaku mbështetës i subjektit politik PDK nëpërmes rrjetit social facebook, ka theksuar, *“Të ngrehet simboli çetnik me tre gishta në zemër të Drenicës, ose duhet të jeshë i çmendur ose çetnik, Pas 25 viteve në liri vijë laperat nga Prishtina të kulmisur në LVV me seli në Prishtinë-Beograd dhe Athinë, në zemër të Drenicës –Skenderaj ngrehin tre gishtërinj ne emër te jatit-birit dhe shpirtit te shenjte. Deri kur do ti tolerojmë këta idiot qe fshehën pas petkut partiak dhe politik, Drenica gjithnjë e ka pase tradite per mikun (buk e krip me zemer) per armikun plumb ballit sepse farën e birzumë në Shumadi vetëm plumbi e skuqë”. “Ta provokosh Drenicen gjakun e derdhur nga viti 1389 kjo eshte antinjerzore dhe bizare! Kush! Bijte e kurvave nga Prishtina! Me demagogun dhe gënjeshtarin me te madh te shek. XXI Kurcin”. Po ashtu ka theksuar se “se herën tjetër a po i presim me lule dhe tepih te kuq apo me batore dhe hanxhar”. Gjithashtu ka theksuar se “ata vijë nga Prishtina me porosi te Beogradit dhe ngrehin tre gishta nuk ka me as toleranc as hyrje ne Drenice dhe kërkon nga strukturat e komunale te Skenderajt qe subjekti politik LVV-ne ta shpallin non grata dhe ate zyre me tre apo katër shulikuranta ta mbyllin, dhe kushe te doje nga Drenica le te veje ne Prishtine apo Beograd te zhvilloj aktivitetet...”.*

Po ashtu Paneli, ka vlerësuar edhe shkresat e lëndës të ofruar si provë materiale, nga e cila rrjedh se Rasim Brahim Rexhepi mbështetës i subjektit politik PDK nëpërmes rrjetit social facebook, ka theksuar *“Mirmëngjesi populli i Albin mashtruesit që nuk ja ka pranë e njoft gruaja shtetin e Kosovës tash nuk e ka as të drejtën e votës a ju e keni ngul në krye të Qeveris një kryeministër që nuk ja njeh gruaja e fmija shtetin çka i duhet kti vëndi, vlerësone vet, dikush e ka jep krejt mundin jetën edhe familjen për kët shtet e kryeministrin nuk ja njeh gruaja shtetin!”.*

Sipas Panelit vendosja përdorimi i kësaj gjuhe nga simpatizantët e subjektit politik të PDK-së, Smajl Lushtaku dhe Rasim Brahim Rexhepi, në kuadër të fushatës zgjedhore, konsiderohet shkelje e rregullave zgjedhore në Kosovë, ngase veprimet e marra në kohë të fushatës zgjedhore kanë për qëllim të krijojnë një lidhje negative ose të nxisë ndjenja të urrejtjes dhe krijojnë atmosferë tensioni dhe përçarjeje. Veprimet i tilla interpretohen si një përpjekje për të manipuluar perceptimin e votuesve, duke përdorur gjuhë fyese, denigruese dhe përqmuese kundër subjektit politik ankues dhe udhëheqësit të saj, dhe se ky veprim shihet si një mënyrë për të përdorur kualifikime të rënda për të stigmatizuar një subjekt politik dhe për të rritur ndjenjat negative kundrejt subjekti ankues. Paneli vlerëson se partitë dhe kandidatët dhe simpatizantët janë të detyruar të respektojnë etikën zgjedhore dhe të shmangin veprime që mund të sjellin pasiguri apo të përkeqësojnë atmosferën politike. Përdorimi i figurave të tilla të përfolura mund të dëmtojë procesin demokratik dhe të rrisë tensionet në vend. Kjo është një shkelje e rregullave që kërkojnë një fushatë paqësore, të ndershme dhe të drejtpërdrejtë.

Përdorimi i një gjuhe të tillë, sipas vlerësimit të Panelit është në kundërshtim me nenit 34 paragrafi 1 pika l.11), e LZP-së, me të cilën përcaktohet *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose*

pasurisë, ose e cila nxit apo mund të nxisë urrejtje kundrejt të tjerëve ose duke publikuar ose përdorur fotografi, simbole ose çfarëdo materiali tjetër që ka ose mund të ketë ndikim të tillë”.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Me nenin 120 paragrafi 1 nën paragrafi 1.3 të LZP-së, është përcaktuar se në rast se PZAP përcakton se ka ndodhur shkelje e të këtij ligji ose e rregullave të KQZ-së, mundet “*të vendosë një gjobë ndaj një subjekti politik, në vlerë deri në pesëdhjetëmijë (50,000 €) Euro.*”

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm i subjektit politik që ka bërë shkelje të legjislacionit zgjedhor, apo ka bërë shkelje të legjislacionit edhe në proceset e mëparshme zgjedhore, që konsiston në faktin se subjekti politik PDK, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje, dhe në zgjedhjet e mëparshme në Kosovë, që do të thotë se i njëjti është i njoftuar me rregullat zgjedhore.

Andaj Paneli vëren se gjuha e përdorur është në kundërshtim me Kodin e Mirësjelljes për Subjektet Politike, Mbështetësit e tyre dhe Kandidatët gjegjësisht me dispozitat e nenit 34 LZP-së, ku janë të përcaktuara veprimet e ndaluara të mbështësve të subjekteve politike dhe me këto veprime janë shkelur dispozitat e nenit 34 paragrafi 1 nën paragrafi 1.11 të LZP-së.

Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme si dhe faktin që subjekti politik në fjalë ka bërë shkelje të natyrës së njëjtë e për të cilat shkelje paneli ka shqiptuar dënime me gjobë. Po ashtu në rastin e caktimit të lartësisë së gjobës së shqiptuar Paneli mori parasysh edhe faktin se kandidati i PDK-së për kryeministër z.Bedri Hamza, iu ka bërë thirrje simpatizantëve të PDK-së, që të kënë kujdes në deklaratimet e tyre publike gjatë fushtës zgjedhore.

Paneli ka vlerësuar edhe pretendimet nga përgjigja në ankesë, mirëpo të njëjtat i vlerësoi si të pa bazuara, për faktin se subjekti politik PDK të njëjtat pretendime nuk i ka provuar me asnjë provë të vetme, kurse provat e prezentuar nga pala ankuese, përkatësisht, fotografia e bashakangjitur ankesës, vërtetohet fakti se Smajl Lushtaku është simpatizant i PDK-së. Gjithashtu edhe me vendimin e PZAP-së nr.240/2025, të datës;30.01.2025, është dënuar dënuar PDK me gjobë, për veprimet e mbwshtwtwsit, Rasim Brahim Regjepi, provë kjo që vërteton faktin se i njëjti është mbështetës i PDK-së.

Nga arsyet e theksuara me lart, e në kuptim të nenit 34 paragrafi 1 nën paragrafi 1.11), neni 118 paragraf 1 dhe neni 120 paragrafi 1 nën paragrafi 1.3 të LZP-së, vendosi si në dispozitiv të këtij

Paneli Zgjedhor për Ankesa dhe Parashtresa

Anr.280/2025, datë;03.02.2025

Kryesues i Panelit
Hajriz Hoti

Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimimit të këtij vendimi.